

- मुख्यमंत्री भजनलाल शर्मा किसान सम्मेलन मांय 70 लाख ऊं बत्ता काश्तकारां ने 702 करोड़ रुपया री सम्मान निधि री दूजी किस्त जारी कीनी।
- राज्य रा सगळा विधानसभा हलकां मांय एक-एक सीएचसी ने मॉडल सीएचसी रा तौर ऊं विकसित करी जावेला।
- प्रदेश मांय सिंयाळू साखां री बुआई रो करीब 90 फीसदी लक्ष्य हासिल करी ज्यो।
- राज्य मांय जोरदार ठंड रो दौर जारी-दो दिन पछे शीतलहर ऊं आरम मिलण रा आसार।

000

प्रदेश री मौजूदा सरकार रा कामकाज रो एक साल पूरो व्हेवण रा सिलसिला मांय आज अजमेर री कायड़ विश्रामस्थली मांय मांय राज्य स्तर रो किसान सम्मेलन राख्यी ज्यो। सम्मेलन मांय मुख्यमंत्री भजनलाल शर्मा राज्य रा 70 लाख ऊं बत्ता किसानां ने मुख्यमंत्री किसान सम्मान निधि री दूजी किस्त रा तौर ऊं 702 करोड़ रुपया जारी कीनी। वे किसानां अर ढांढा पालण वाळां ऊं जुड़ी मुख्यमंत्री पशु मंगला बीमा योजना अर ऊंट संरक्षण अर विकास मिशन समेत 4 नुवी योजनावां री सरुआत ई कीनी। ई मौके मुख्यमंत्री कह्यो के प्रधानमंत्री नरेंद्र मोदी री अगुवाई मांय देश मांय किसानां रा भला सारू भांत-भांत री योजनावां चलायी जा रही है।

ई मौके उप मुख्यमंत्री दिया कुमारी कह्यो के राज्य मांय किसानां अर पशुपालकां रा भला सारू केई योजनावां चलायी जा रही है।

सम्मेलन मांय न्यारा-न्यारा जिला ऊं वीडियो कांफ्रेंसिंग रे जरिये जुड़्या किसान मुख्यमंत्री रो धन्यवाद कीनो। सांचौर रा किसान रामलाल कह्यो के योजना रा तैत मिली रकम ऊं वे खेत मांय तारबंदी करवाई, जिण ऊं वां रा खेत मांय ढांढा -ढोर नी घुस सके है।

कार्यक्रम मांय 20 हजार गौपालकां ने क्रेडिट कार्ड दिया ज्यो अर महिला सहकारी डेयरी समिति री महिलावां ने सरस डेयरी रा 1 हजार बूथ आवंटित करी ज्यो। राज्य री मौजूदा सरकार रा काम-काज रो एक साल पूरो व्हेवण रा सिलसिला मांय राख्या जा रह्या कार्यक्रमों री कड़ी मांय काल उदयपुर मांय महिला सम्मेलन राख्यो जावेला।

000

राज्य सरकार प्रदेश रा हर विधानसभा हलका मांय एक-एक सामुदायिक स्वास्थ्य केंद्र-सीएचसी ने मॉडल सीएचसी रा तौर ऊं विकसित करेला। सीएचसी माथे आवण वाळा मरीजां री तादाद ने ध्यान राखता थकां जनता रा नुमाइन्दां सागे बातचीत पाछे स्वास्थ्य विभाग ई सारू पात्र सीएचसी तैय कर लीनी है। मॉडल सीएचसी मांय महिलावां अर बच्चां री बीमारियां रा जाणकार डॉक्टरां समेत न्यारा-न्यारा डॉक्टर सेवा देवेला। स्वास्थ्य विभाग मांय निदेशक-जनस्वास्थ्य आकाशवाणी ने बतायो के अठे मुफ्त मिलण वाळी दवाइयां री तादाद ई बत्ती व्हेला। आं केंद्रां माथे जांच अर दूजा सुबीता ई मुहैया कराया जावेला।

000

देश 23 साल पैली 13 दिसंबर 2001 ने संसद भवन माथे व्ह्या आतंकी हमला ने नाकाम करण रे दौरान जान कुर्बान कर देवण वाळा जांबाजां ने आज सिरधाभाव सागे याद कर रह्यो है। राष्ट्रपति द्रौपदी मुर्मू अर प्रधानमंत्री नरेन्द्र मोदी सोशल मीडिया रे जरिये आं बहादुर जवानां रा बलिदान ने याद कीनो। संसद रा दोन्यू सदनां मांय ई आं जांबाजां ने श्रद्धांजलि दीरीजी अर वां रा मान मांय मौन राख्यी ज्यो। ई मौके लोकसभा अध्यक्ष ओम बिरला कह्यो के सदन आतंकवाद रो मजबूती ऊं सामो करण सारू प्रतिबद्ध है।

उपराष्ट्रपति अर राज्यसभा रा सभापति जगदीप धनखड़, प्रधानमंत्री नरेन्द्र मोदी, लोकसभा अध्यक्ष ओम बिरला, केंद्रीय मंत्री, लोकसभा मांय विपक्ष रा नेता राहुल गांधी, राज्यसभा मांय विपक्ष रा नेता मल्लिकार्जुन खड़गे समेत केई सांसद संसद भवन मांय आं जांबाजां ने श्रद्धांजलि दीनी। ई हमला

मांय देश सारू जान देवण वाळा जांबाज जे.पी. यादव ने ई आज वां री पुण्यतिथि रे मौके सिरधा भाव सागे याद करी ज्या। नीमकाथाना मांय श्रद्धांजलि सभा राखी ज्यी, जिण मांय मोटी तादाद मांय लोग सिरकत कीनी। ई सिलसिला मांय नीमकाथाना जिला अस्पताल मांय मरीजां ने कंबल दिया ज्या। शिक्षा मंत्री मदन दिलावर वां रा प्रभार वाळा जिला जोधपुर रा तीन दिन रा दौरा रा दूजा दिन आज लघु उद्योग भारती रो नुवो बणायी ज्यो कौशल विकास केंद्र जनता ने सूंप्यो। ई मौके वे कह्यो के ओ केन्द्र उद्योगां अर कारीगरां री जरूरतां पूरी करेला। कार्यक्रम मांय संसदीय कार्य मंत्री जोगाराम पटेल ई सिरकत कीनी।

000

प्रदेश मांय जोरदार ठण्ड पड़ रही है। सीकर जिला रा फतेहपुर मांय पारो आज तीजा दिन ई शून्य ऊं नीचे दर्ज करी ज्यो। माउंट आबू मांय 1 दशमलव 4, चूरू मांय 3 दशमलव 1, करौली मांय 3 दशमलव 6, पिलानी मांय 4, संगरिया मांय 4 दशमलव 3, चित्तौडगढ़ अर अंता मांय 4 दशमलव 7 अर सिरौही अर सीकर मांय 5 डिग्री सेल्सियस न्यूनतम तापमान नापी ज्यो। दूजी कानी राजधानी जयपुर समेत कठे-कठे पारो चढ्यो, पण शीत लहर रे कारण सर्दी रा तेवर तीखा बण्या रह्या। मौसम केन्द्र जयपुर रा निदेशक राधेश्याम शर्मा बतायो के दो दिन पाछे शीतलहर ऊं आराम मिलण रा आसार है।

000

राजस्थान हाईकोर्ट बार एसोसिएशन अर दी बार एसोसिएशन समेत जयपुर मांय वकीलां रा न्यारा-न्यारा संगठनां रा चुणाव सारू आज संवारे आठ ऊं सिंज्यां पांच बज्यां ताई वोट पड्या। हाईकोर्ट बार एसोसिएशन, जयपुर रा चुनाव मांय 17 ओहदां सारू 58 उम्मीदवार अर 5 हजार 716 मतदाता है। अध्यक्ष ओहदा सारू पांच, महासचिव अर उपाध्यक्ष ओहदा सारू सात-सात, कार्यकारिणी सारू 23 अर 16 उम्मीदवार दूजा ओहदां माथे चुणाव सारू उम्मीदवार है। वोटों री गिनती काल करी जावेला।

000

गौपालन अर पशुपालन मंत्री जोराराम कुमावत आज जैसलमेर जिला रा लाठी हलका मांय लगायी ज्या उष्ट्र रोग निदान अर उपचार शिविर रो दौरा कीनो। वे अहलकारां ने ऊंटों रा बेहतरीन उपचार बाबत जरूरी हुकम दीना। ई मौके गौपालन मंत्री कह्यो के सरकार ऊंटों ने बचावण सारू खास कोशिशें कर रही है। सरकार ऊंट संरक्षण योजना रा तैत ऊंट पालण वाळां ने दी जावण वाळी मदद री रकम 10 हजार ऊं बधा र 20 हजार रूप्या कर दीनी है। सवाईमाधोपुर जिला मांय ई पशुपालन विभाग री ओर ऊं न्यारी-न्यारी ठोड़ां ऊंटों री बीमारियां रा ईलाज रा शिविर लगायी ज्या। बालेर मांय 95, लहसोड़ा मांय 87 अर रामगढ़ मुराडा मांय 45 ऊं बत्ता ऊंटों री स्वास्थ्य जांच करी ज्यी। ई सागे ई पशुओं रा डॉक्टर ऊंटों री ट्रिपनोसोमा बीमारी अर वां रा पेट अर शरीर रा परजीवियां ऊं जुड्यो ईलाज ई कीनो।

000